

## **Paulo Ena Malele PILEMONA Kevanai**

### *Puka Laloana Ielena Luvana*

Pilemona 'eva kau namana ka, ia 'eva abiveni kauta Koloseai kauta elalovaita. Pilemona 'eva maiena da'ala abi kauna, ia vana 'eva Onesimo. Onesimo 'eva eveau 'akauma ena 'ola kauna kevanai, inoku eda'a vanua edeana ka laloanai emia. Vanua kanaua'i Paulo ita devidavali inoku elalo'udai. Melala kanaua'i Paulo 'eva vabuto'o 'abunai 'ounai Pilemona ita beluvaluva 'eva epasisi. Kanaua 'ounai malele kanania eleleia, inoku Onesimo evenia, ia betata'u beabia beda'a ena 'ola kauna bevenia.

Malele kanania laloanai, Paulo eta'u Pilemona eva'amea ena da'ala abi kauna beabidae mainuana nama'inanai. Mai e'ouia Onesimo 'eva 'ani elalo'udai ena mauli Lovia namana evenia. Paulo mainuana bounai Pilemona enoi vali'u melala kanania bedada'a laloanai Onesimo be'aea ia bo'akalana umauna.

### *Puka Iduvuna Namata*

- a. Lova aku. (1-3)
- b. Vanama'ina Luvana. (4-7)
- c. Enoinoi Onesimo dainai. (8-22)
- d. Luva to'ona. (23-25)

### *Vanama'ina Luvana.*

<sup>1</sup> Lau Paulo, Keliso Iesu dainai avabuto'o kau'u, mai bo'akalata Timoteo ita malele lai alelea evavasi Pilemona, emai kau ma'adi ita kavinaula ka'ona kaumu kevamu,

<sup>2</sup> mai lovuta Apia, Alekipo kakuali ka'ona kauna mai Dilava ena lo'e kauta na'i emu lumai oi odo'u ka'ona kauta boumuiai kele'emui.

<sup>3</sup> Ameamea Dilava ita Kamata mai Lovia namana Iesu Keliso eta iulaveni koana mai nua'elu 'eva kevamuiai bemimia.

*Pilemona Ena Lalo'au  
Mai Abiveni.*

<sup>4</sup> Melala boutai e'u meamea ai oni alalovaimu mai e'u Dilava vanama'ina luvana avenia,

<sup>5</sup> 'olana emu abiveni Lovia namana Iesu kevanai abivenina mai emu lalo'au Dilava ena kau kabukabuta kauta boutai kevatai lalo'auna valita 'ani aika.

<sup>6</sup> Lau ameamea 'eva eta vikauai oni emu abiveni bevinaula kave'i laloanai dava nama'ita Keliso enai 'ani kabita davata kataua boutai boikabasita kave'i.

<sup>7</sup> Kadi'u ma'adi e, emu lalo'au kanaua eta'u e'u lalonama evanamala vaika mai nua'u evakula'ilala vaika, 'olana bo'akalata Dilava ena kabukabu kauta nuata ova'elu 'ounai.

*Paulo Onesimo  
Dainai Enoinoi.*

<sup>8</sup> Kanaua 'ounai Keliso laloanai lau 'eva bamanua to'oto'o bamavasiasimu inoku vinaula kololona bomavavaia.

<sup>9</sup> Beia alalo'au venimu 'ounai, kanaua sia bakoma ia anoimu. Lau Paulo vali'u 'ani amotu maivaka Keliso Iesu dainai avabuto'o kau'u,

<sup>10</sup> naku'u Onesimo dainai lau oni anoimu, ia 'eva lau naku'uai eao ua'i vabuto'o lumanai amia laloanai.

<sup>11</sup> 'Ana'inai 'eva ia ena nama'ina asi'i oni keva-muai, ia vali'u 'eva ena nama'ina 'ani namana eao oni mai lau kevatai.

<sup>12</sup> Lau 'eva ia asinia 'udai evavasi kevamu. Beia nua'u umaunai alalo'au venia kauna asinia.

<sup>13</sup> Lau nia'i vali nama'ina dainai avabuto'o laloanai a'ula bama abi'inia bemamia oni 'abumu bema abia lau bemadulu'u.

<sup>14</sup> Beia lau sia dava ka bavavaia beda'amo oni boluva kave'i makava, inoku oni emu nama'ina ka lau keva'uai bovavaia, kanaua 'eva oni emu ulai bovavaia ia sia lau e'u vasiyasi dainai bovavaia.

<sup>15</sup> Onesimo 'eva melala kava'inamo evikanimu, viloamui e'alama 'ounai vali'u 'eva boabia 'udai kevamuai bemia vaika.

<sup>16</sup> Ia 'eva sia da'alabi kauna boina, beia ia 'eva enama'ina vaika vakaia da'alabi kauta, ia 'eva bo'akalata lalo'auna, maivaka lau 'eva ia alalo'au venia, beia vali'u oni 'eva ia bolalovaia namavaikana, ia 'eva da'alabi kauna mai bo'akalata umauna Lovia namana enai.

<sup>17</sup> Kanaua 'ounai, oni olalovaia lau emu kau umau'u koanai, Onesimo boabia dae kave'i itani lau oabi'u dae boina.

<sup>18</sup> Ia oni kevamuai dava ka evasi'avanala 'o kevamuai dava ka eabia 'avaea koanai, dava kataua boutai 'eva lau va'uai bo'ule.

<sup>19</sup> Lau Paulo luva kanania lau sibo'u ima'uai alelea. Tava vida 'eva boutai tavata baveni 'udai. (Ia oni adulumu dava odavalia davana lovana sia akua.)

<sup>20</sup> Kanaua 'ounai, kadi'u e, lau anoimu Lovia namana vanai e'u ula kanana bovavaia, Keliso laloanai nua'u bovamakamakala 'udai.

<sup>21</sup> Lau malele kanania alelea 'eva aikabasi e'u noinoi kevamuai noinoina vinalana 'ani bovavaia keini.

<sup>22</sup> Mai lumai da'a'au daiutuna ka bovavaia kave'i lau e'u, 'olana e'u nuabata Dilava enai 'eva emui meamea beabia dae inoku lau bavasi kevamu.

*Vanama'ina Luvana To'ona.*

<sup>23</sup> Lau bano'u ka Epafala, Keliso Iesu dainai lalua ana lai avabuto'o ka'ona kauna ena vanama'ina luvana esinia oni kevamu.

<sup>24</sup> Maivaka Maleko, Alisitako, Dema, mai Luka, lau ita avinaula ka'ona kauta eta vanama'ina luvata desisini.

<sup>25</sup> Ameamea eta Lovia namana Iesu Keliso ena iulaveni koana 'eva oi idumemuiai bemimia.

**Luva'ana'i Namana Makamakana**  
**The New Testament in the Nara language of Papua**  
**New Guinea**  
**Nupela Testamen long tokples Nara long Niugini**

copyright © 2024 Global Bible Translators

Language: Nara (Lala)

Dialect: Nara

Translation by: GBT

Contributor: SIL Papua New Guinea and Namseul Presbyterian Church in South Korea

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-08-29

---

PDF generated using Haiola and XeLaTeX on 3 Sep 2024 from source files dated 29 Aug 2024

f0f11a93-ea2f-5af2-b48b-3653b522a3fb